

# TEXARÕN JÕ KRĨ WÛR

## Mam Pawrô Jõ Kàhhôc

Ûhÿ, pê Pawrô pê Jeju jarkwa na memprar catêjê nõ. Ne pê Texarõn jõ krĩ kam Jeju na mehkwy jakrã mehkri atajê wÿr, pom cu me hõ kàhhôcpijakrut cahyt itajê kujate. Na pê mam hõ kàhhôc ita japry pê **Texarõn Jõ Krĩ Kam Jeju Na Mehkwy Jakrã Mehkri Atajê Wÿr, Mam Pawrô Jõ Kàhhôc** (1 Texarõn).

Ne Pawrô te Jeju to amji mã mehhimpej to me ipa, cwÿrjapê rime cupê Pahpãm tekjê nare atajê ame to kêanre, mã cute me amji pupun xà kêanre to me amji pupun. Ne hõ kàhhôc ita kam, Pawrô te me cumã catyt kam Pahpãm kôt cute me hũcanãar kam me ipa kam me to incrà nahâpôr. Ne cute me cumã hacpÿ ne Jeju te amji jaxâr, ne cute me pahcunea to côjkwa wÿr hàpir na harên.

*Pê Pawrô me cumã amji jarẽ  
Me Hàpên Xà 17.1-9; 17.13-15*

<sup>1</sup> Hàpà, me ikjêjê, pom ca Texarõn jõ krĩ kam meakri atajê, Pahpãm me, me pajõ Pahhiti pê Jeju Crixto tekjê na ame apa atajê. Ipê Pawrô, mã icahê na Xira me Timot ame ipa. Wa ha me ikjêjê itajê me, me amã ihhòc ne me amã ihkujate. Wa Pahpãm mã me acunea cajrên to ipa, ne me acunea caxuw Pahpãm me, me pajõ Pahhiti pê Jeju na ijàhwÿr to ipa, quê me amã me apejti jôr to ipa, ca me acarĩcre kam me apa.

*Pê Texarõn jô krī kam Jeju na mehkwy ihtỹj  
ihkôt me amji to*

<sup>2</sup> Me apê Pahpãm kôt me apa catêjê impeaj. Ampo na? He cutea ri me amã acarôt jôr, catyt kam me apa xà caxuw. Wa ita pyrên ame ijakry neijôtpê me Pahpãm mã me garê, me apyrên me ijakryti na.

<sup>3</sup> Wa Jeju to me ate amji mã me ahimpej na me ato amji japackre, ne ampo pejti to pit mã me apipê to me apa, ne me gâhcaprĩa kam me gâpên tocatia to me apa, ne Jeju mã me amji jôr to me apa. Ca hôtpe Jeju pê me pajô Pahhiti te amji kam hapac xà ata na, me gũcanãar kam me hikaj to me apa. Wa ahna me atoaamji japackre, ne Pahpãm pê me pajô Inxũ Cati mã me acajrên to ipa.

<sup>4</sup> Me ikjêjê, me imã, Pahpãm te amji mã me acapi, ne cumã me akĩnti na, me gahkre pej.

<sup>5</sup> Wa ite me amã Jeju pê me pahkritxwý jarên xà impejti jarên, ne nee wa meijarkwa cakrô to pit mã me amã ijũjarên nare. He wa hanea ne Pahpãm Carô Pejticarôt týtji pejti kôtme ato me ihimpej to ipa, ne pom wa me amã ijũjarênxà to ijũjarên to ipaitajê ampeaj kam ri. Wa ite me hahkre peaj xà na me amã harê. Por pê wa ajco me acahê na apu ipa reria mã, me acaxuw ampo pej to pit mã amji kam ijapacto ipa, pê ca ajco ahna me ipupu. Ne ramã ate ampoitajê na me ijahkre pejtu.

<sup>6</sup> Ne ate me Jeju jarkwa pyr ne ihkôat me amji ton, ne hanea ne ate ikôat me amji ton, ne hanea ne me pajô Pahhiti kôt me amji ton. Ne icuxà ate me amji pupun xà kên kwý to ame amji pupun.

Ampo na? Porme cupê Jeju na mehkwỹ nare atajê hôtpê ame ato kêanre cakrô, ca ate Pahpãm jarkwa kôt me amji ton. Cwÿrjapê ri Pahpãm Carô Pejti te me amã gakryti jôr.

<sup>7</sup> Cwÿrjapê ri me pahkjêjê cunea te ahna me apupun. Por ame Maxeton jô pjê kam, me Crec jô pjê kam me pahkjêjê amehkrî atajê cunea te ramã me gahkre pej. Ne ahna impejti, ne quê haita na me gahkre pej, ne me acuxà me ita to hane.

<sup>8</sup> Ca ate me pajô Pahhiti to amji mã me ahimpej. Ne mër ampo na mã me ato me hũjarên xà itajê pjê cunea kam apu ihcahkũm? Me acwÿrjapêa riapu ihcahkũm. Mã gô pjê pê Maxeton jô pjê ata kam, cute me ato me hũjarên par, ne hanea ne Crec jô pjê kam ate Pahpãmto amji mã me ahimpej ata na, me ato me hũjarên par. Cwÿrjapê ri hanea ne me acuxà, cute Pahpãmto amji mã me ihmipej. Ne hipêr ite me amji to me amã icakôc xà nare. Ampo na? Ramã mehcunea amji mã me ato mehcakôc to me ipa.

<sup>9</sup> Ne krî cunea kôt amji mã me garên tome ipa. Ampo na? Ca ate ampeaj kampahpãm cahàc krekà tète me amjijũhhÿr, ne quêt Pahpãm tĩarkôt amji kam me gapac. Ne ampeaj kam riPahpãm ihtĩar na ipa, ne taa pyxit peajne me pahto ihmipej. Na ca ha cumã me gápên to me apa.

<sup>10</sup> Ne pê Pahpãm ihkra Jeju to hacpÿ mã ihtĩr, neme ca, ca atÿj hacpÿ ne còjkwa pĩn cute amji jaxàr xà na ame hikaj. Ampo na? Taa mã quê ha Hũmte mehkên catêjê wÿr mehkên xà kujahêc

xà ata pê me pahpytà. Quê ha Pahpãm ma amji tète apu mehkên catêjê curê, ne nee quêt amji tète ame pahcurê nare.

## 2

### *Pê Pawrô me cumã to hahkre to impeaj ne*

<sup>1</sup> Pê wa me awÿr icator xà ata kôt hamre nare. Pê wa me awÿr me icato, ne Jeju pê me pahkritxwÿ jarên xà impejti to me amã harê. Pê ca atÿj Jeju toamji mã me ahimpej, ne me acunea te ramã me hahkre pej.

<sup>2</sup> Pê wa me awÿr icator xwÿjrea na, Pirip jô krĩ kam me ito kên crire nare, pê wa meamji pupun xà kêanre to me amji pupun crire nare. Pê ameixûn xà kêanre to ameixûn cakrô, pê Pahpãm me imã icarôt to ihtÿj, pêwa Jeju jarên pejti to me amã harê.

<sup>3</sup> Pê wa nee me amã ihêj xi to ijÿjarên nare, ampeaj kam pê wa me amã awjarê. Ne nee wa me amã ihêj xi to prãm to me awÿr me icator nare.

<sup>4</sup> Pê Pahpãm me ikujate, wa Jeju jarên pejti to me amã harên to me ipa. Cwÿrjapê pê wa nee jÿm te hakry xà na ame ijÿjarên nare, ne quêtPahpãm te me pahkam hakryti prãmte, pê wa me icato. Ne ame amã ijÿjarên to me ipa, por Pahpãm me pahpupu ne me pahcajpêr to ipa ata.

<sup>5</sup> Nee wa ihêj ne amji cwÿrpê ame ato ikwÿ nõ nare. Ne nee ate me imã ampo jôr xà na, wame amã ijÿjarên to apu iprar nare. Pahpãm me, meate ita na me ijahkre pejtu.

<sup>6</sup> Wa nee jÿ caxuw me anõ te me ipejtina me ijarên na me prãm nare. Neme ipê Jeju jarkwa

na me iprar catêjê cokrô, wa nee jũ caxuw jũm te amji mã me icupa na, imã me to prãm nare.

*Pê Jeju Texarôn jô krĩ wÿr Pawrô kujate*

Ne nee jũm te me awÿr me ikujahêc nare, neJeju pê quêt amji mã me icapi, ne me awÿrme ikujate cokrô, wa nee me amã icakôc tÿaj to me ipa nare.

<sup>7</sup> Ne me amã icakôc pejti to ipa, pom hãn ne menxÿrxwÿ mehkra mã ihcakôc tÿj nare, ita to pê wa ajco me amã icakôc to ipa, ne pê wa ajco me amã icakôc tÿjnare to ipa.

<sup>8</sup> Ne imã me akĩan to me akĩn. Cwÿrjapê wa itÿj me amã Pahpãm pĩn Jeju jarên pejti hapôj itajê jarên prãm. Ne cormã ita jipycumã me akĩn ita kam, wa itÿj me acwÿrjapê me itycprãm, ne imã me akĩn ne me gapêti incwÿrjapê.

<sup>9</sup> Me ikjêjê, por pê wa me ijàpên xà to atajê na me ito amji japackrea ne. Pê wa hanea ne ijàpên xà itajê kam amji pupun xà kêanreto amji pupu. Pê wa amcro me caxwa kam me gôt cwÿar ajco me ijàpên to me icuhhê, ate me imã me gãmjôr nare prãm to. Hõ, pê wa ajco me ato hajÿr to ipa, ne me amã Jeju pê me pahkritxwÿ jarên xà impejti to harên to ipa.

<sup>10</sup> Pê wa ampeaj kam catyt kam ajco me ipa, nenee pê wa me ampo kên crire nõ tonnare. Ne nee pê wa ampo to ajco me amã me apahàm ton to ipa nare. Pê ca ramã ita na me ipupu, ne me ijahkre pej, pê Pahpãm hanea ne ramã ahna me ipupu ne me ijahkre pej.

<sup>11</sup> Ne ramã ate amji na me ijahkre pej, wa me ato ijapên to ihhêj rûm me hûmjête mehkra to hapên ita na, wa me ato apê.

<sup>12</sup> Ne wa ita na itÿj me aràn to me ipa, ne ahna me amã hakam to me ipa. He wa nee ampo caxuw ame gapackre nare, mâr ca ampeaj kam me awpa ne catyt kam me apa. QuêPahpãm me apyrên hakryti to ipa xà caxuw, wa ame gapac caxun to me ipa. Nãmri Pahpãm te ihtÿj me anahàhwÿr, ca mehkwy mã axà, quê ato impejti to ipa. Nequê ha jû caxuw amcro nõ na, mehcunea Pahpãm himpej xà kam me ajÿr na me apupu, hõ amcro jàhcujrohti ata kam. Ita caxuw ri Pahpãm te me ana hàhwÿr.

<sup>13</sup> Cwÿrjapê wa hõtpê me ana Pahpãm mã icakôc, ne cumã me apyrên me ijakryti na me amji jarê. Ne Pahpãm te ito ihhimpej xàa kôt pê wa ajco me atoihimpej, pê ca ihhimpej xàa kôt me amji to. Ne me gũparpyrentu, nãmri me icakôc xà ita pê nee me hûmre nõ pîn cator nare. Pahpãm pîn pê hapôj, pê ca ramã me hahkre pejtu. Cwÿrjapê pê ca me gũpar pyrentu, ne Pahpãm jarkwa kôt ame amji ton to me apa. Mãharkwa ita me atête hàmtàr to ipa.

*Pê mam Pawrô ramã amji pupun xà kêanre to me amji pupun to ipa*

<sup>14</sup> Me ikjêjê, pê ca, me akwÿa kam ramã me amji pupunxà tó kên crire nare. Ne por pê ca me amjipupun xà kên atajê kwÿa to, pê wa ramã me amji pupu, Juta catêjê jõ pjê kam Jeju na mehkwy pê mam me amã me amji pupu.

15 Ne Juta catêjê pê Pahpãm na mehkwy nare atajê, pê me pajõ Pahhiti pê Jejucura, ne hanea ajco me Pahpãm jarkwa to mehcahôc catêjê cura. Ne pê hanea ne me ito hanea, ne ma amjitête ame icurê. Ne nee Pahpãm mã me hakry jõr to meipa nare, ne ihtyj mehcunea curê to me ipa.

16 Ne Juta catêjê mã, pê ite mehcahkrit atajê mã Pahpãm jarkwa jarên ita na, ihkaj na. Wa ite Jeju te mehcahkrit pê Juta catêjê nare atajê pytâr xà to, me cumã ijũjarên na, me cupê ihkaj na. Mã cama mentête me ijuwahi to prãm. Ne pom meijuwahi to prãm itajêa ri cormã nee cute mehkên ton to me hîcu nare. Ne ampo kên to pit mã me amji japackre to me ipa. Cwÿrjapê quê ha Pahpãmuu ne me kam incryc jîcu nare.

*Pê Pawrô hipêr Texarôn catêjê pupun prãm  
Me Hàpên Xà 17.10-13*

17 Ýhÿ, me ikjêjê, pê wa ma me apê me pra, ne me ijî to pit mã me hawry, ne pahte amji kam me pajapac xà, nee ajpên pê hũwrynare. Ne ampeaj kam me ato ijapac xà, cwÿrjapê ri hipêr imã me apupun prãm crire nare.

18 Ne me ikjêjê kwÿ me, wa me awÿr me ikrâr. Ne pa, ipê Pawrô, wa me hirôa pê me awÿr ikrâr cakrô, mã me pahcurê xwÿn te jũ mã me iton, ne meijuwahi, wa nee me awÿr me iprar nare.

19 Na wa me apyrên ame ijakry catia, ne me acwÿrjapêa ri me ijâpên xà itajê kôt hamre nare. Ite me ana ijâpên xà ita cunea tohjê, neijõtpê mehcunea mã me ato me ijũjarên pejti to me ipa. Ne por quê ha amcronõ kam, Jeju te amji jaxâr xà ata kam, cu ha me pahcunea cuna mã me ahtwÿ

ne me pahcuhhê. Ne ampeaj kam, quê ha me akam me ijakry, amcro ata kam.

<sup>20</sup> Ỡhỹ, ampeaj kam ri me apyrên me ijakrya tome ijakry. Wa hãn ne itỳj me ato mehcunea mã me icakôc to me ipa.

### 3

<sup>1</sup> Jicu xà kam, wa nee hipêr ahte ame ipa xà ita mã me ijũcanâr nare. Cwỳrjapê wa Atên jô krĩ kam me ijãhhuc.

<sup>2</sup> Ne ite me awỳr me pahtô Timot kujahêc. Ne me pahtôTimot ita me Pahpãm jarkwa na apê, ne me icahê na Jeju jarên pejti to harên to ipa. Wa me ite me awỳr mehkujahêc, cute me aràn ne me atehcajpar, mâr ca ampeaj kam Jeju to amji mã me ahimpej to me apa xà na.

<sup>3</sup> Mâr quê me akwỳ nõ ame acurê, ca jũmjê itajê cupate nee Jeju kôt amjiton to hicu nare. Ne ate me ampo kên itajê mã me gũcanâr xà caxuw, pê Pahpãm amji mã me girê. Ne ramã ita na me ate me amji jahkre pejtu.

<sup>4</sup> Pê wa cormã me akam ame ipa reria mã, me amã ampo kên itajê na me pahte amji pupun ita, pê wa me amã harên hiahpuro, ate me hahkre pej prãnte.

<sup>5</sup> Na wa ite me awỳr Timot kujahêc, ite me garên par prãnte. Ampo na? Jũ wỳr wa me gahkre pej nare kam, hipêr me awcanã. Mâr ca ampeaj kam Jejuto amji mã me ahimpej, ne ihkôt me amji ton to me apa, wa me garên pa, ne me ijakry. Nãmri imã me anapa, quê ihhêaj to me pahcurê xwỳn jũ na me ato, ca Xatanaj kôt me amji kampa, ne Jeju to amji mã me ahimpej



jicu. Nãmri ca ha ate me ita to hajÿr na, quê ha meijàpên xà itajê kôt hamreare ne.

*Pê mehkwỹ te Jeju to amji mã mehhimpej pyrên Pawrô hakry*

<sup>6</sup> Ne ma ramã Timot me awÿr tẽ, ne ramã cute amji jaxàr ne cute imã me garên pejti to me garên. Ca ampeaj kam Jeju to amji mã me ahimpej to meapa, ne me ajpên to impejti to prãm to me apa. Ne atÿj me ito me amji japackre to me apa, ne me amã me ipupun prãmte hajÿr, pom quê imã me apupun prãm he.

<sup>7</sup> Wa ita ri me amji pupun xà kêanre to me amji pupun to me ipa, ne kam amji jahkre kêatre to ame ipa cakrô, mã Timot te, ca atÿj ame apa na, imã me garên. Wa me ijũpar, ne me apyrên ite me ijakry to me amji ràn.

<sup>8</sup> Ca Jeju to amji mã me ahimpej to me apa, cwÿrjapê wa ite me ijakry to me amji ràn. Ca Jeju kôt me atÿaj kam me amji ton to me apa, cwÿrjapêwa me ijakrya kam me amji to me ipijapar to me ipa.

<sup>9</sup> Ne wa Pahpãm kam mare mã me apyrên meijakry cati, ne me ana me Pahpãm mã me icakôc cati.

<sup>10</sup> Ne wa caxwa me amcro kam, Pahpãm na me ahwÿa to me ahwÿ, me ina cuhkônre cunea to, quê me ana me ijamã, wa me itoa to me apupu. Quê ihhêaj to ate Pahpãm toamji mã me ahimpej xà ata kam, me apê ampo hamre na, wa ha cormã me amã to hahkre.

<sup>11</sup> Wa Pahpãm me, me pajõ Pahhiti pê Jeju name ijàhwÿr to me hajÿr he, quê me imãme

awÿr pry ita to impej, ne ihkôt me ikujate me awÿr.

<sup>12</sup> Wa hanea ne ahna me ijàhwÿr, quê hân ne hōtpê me amã ajpên kīnti ita to ipicamên to ipa. Ne hanea ne me amã me akwÿ cunea kīnti itato ipicamên to ipa. Ne ate me ajpên kīn ita, quê ha ipicamên to mō, ne me ite me akīn ita me ajpēan.

<sup>13</sup> Na quê ha me amã me ana cuhkônre to ihtÿj. Cwÿrjapê ca ha me apej pit, Pahpām pê me pajō Inxū Cati cuna mã, ne nee ame apahàm nare. Quê ha me pajō Pahhiti Jeju, por ihkôt me ipa catêjê atajê to ajpên mō, ca ha me cuna mã apejti to xã.

## 4

### *Pê Texarôn catêjê pyrên Pahpām hakry Roman 13.11-14; Èpet 5.3-14*

<sup>1</sup> Ỳhÿ me ikjêjê, wa ha hipêr me amã ampo jarê, neme amã to hahkre. Ne wa ramã ite me amã to hahkre, ca me ate me hahkrepej, ne ramã Pahpām kôt me apa to me ate me amji pyrác. Cwÿrjapê ri me apyrên Pahpām jakry. Ne wa cormã mepajō Pahhiti pê Jeju japrÿna me ana ahwÿ ne me gapackre, mār ca hipêr ihkôt me apicamên to me mō.

<sup>2</sup> Ne ramã me pajō Pahhiti pê Jeju jarkwa kôt ite me amã ampo kwÿ to hahkre, ca ramã ate me ampo itajê jahkre pej, ne me hōmpun.

<sup>3</sup> Ne ampo itajê na ri Pahpām mã me ana prām he:

Ca Pahpām jarkwa kôt catyt kamme apa.  
Ne nee ahti na ame pyjê to me axy nare.  
Ne amji na me apahàmti to me apa.

<sup>4</sup> Ne hanea ne Pahpãm mã me ate catyt kamme aprõ to me amji prõ impejti na cumã me ato prãm.

<sup>5</sup> Ne nee me apê krĩxàre kwỳ pê Pahpãm jahkre kêatre atajê pyrác, ne cama me aprõ to ame apahàm nõ prãm nare, ne me to amji prõa ne.

<sup>6</sup> Ne pahte mehprõ cahkrit to me caxun ita na ihkaj na. Ampo na? Ca ha ramã nee amji mã impjên ata cupa nare.

Wa ha hipêr ampeaj kam me amã harê, pom ramã ite meamã harên ita, quê ha Pahpãm ihtỳj cute ame ampo itajê ton jahpan xà na me to kèanre ne.

<sup>7</sup> Pê nee Pahpãm ampo itajê caxuw me pahna hàhwỳr nare. Catyt kam, harkwa kôt, pahte me papa xà caxuw pê quêt me pahna ahwỳ.

<sup>8</sup> Quê ha jũm apu ite ampo to hahkre xà itajê caca na, quê ha nee me paxũmre nõ jarkwa caca nare, ne Pahpãm jarkwa quê ha apu ihcaca. Por Pahpãm te mepamã Carõ Pejti jõr ata quê ha apu ihcaca.

<sup>9</sup> Wa nee hipêr ate me ajpên kĩn na me amã ihhóc prãm nare. Nãmri pê ramã Pahpãm me ate me ajpên kwỳ kĩn to me amã hahkre.

<sup>10</sup> Ne me ate me ajpên kĩnti ita to, ca ramã Maxeton jõ pjê kam ame akjêjê kĩn to me apa. Ne wa ha cormã me ana ahwỳ, ca hipêr me ajpên kĩnti ita to me amji mã me ajcamê.

<sup>11</sup> Ne gõtpe me acarĩcti kam me apa na, ca me ahcukij. Ne hanea ne me ate amji kam me gapac xà atajê to pit mã me amji mã me ahimpej to me

apa. Ne megapên xàa to me amji to ajpa to me apa.

<sup>12</sup> Ca ha ate me itajê cunea ton to me apa na, quê ha me cupê Pahpãm na mehkwy nare catêjê ihtyj amji mã me acupa to me ipa. Ca ha nee ate ampona me prãm xà atajê kôt ame jũm na prãm nare.

*Quê ha Jeju cõjkwa wÿr me pahto api*

<sup>13</sup> Yhÿ me ikjêjê, me imã me ate mehtyc atajê jahkre pej pejtì na me ato prãm. Porme cupê Pahpãm na mehkwy nare catêjê pêmehkwÿ ty, mã me cumã amji kìn nare atajê cuxà, ca nee me amã amji kìn nare nare. Ampo na? He me pahkĩnte nee me cumã hacpÿa mã mehtırna me hahkre pej nare na ri.

<sup>14</sup> Xà Jeju tyc ne nee hacpÿ mã ihtır nare? Hãpà, ihtyj ihtyc ne hacpÿa mã ihtır! Mër hõhõ, quê ha Pahpãm Jeju kôt me ipa catêjê to hanea, pom quê Jeju he, ne hacpÿa mã me to ihtır.

<sup>15</sup> Wa ityj me pajõ Pahhiti pê Jeju jarkwa kôt me amãawjarê. Quê ha amcro nõ na, Jeju cõjkwa wÿr me pajaprõr prãmte pjê wÿr, ahcacrã kam, amji jaxà. Nemam mehtyc itajê na ahwÿ, quê ha me api. Jirõ pê cu ha cormã me pahtır itajê mehkôt me api.

<sup>16</sup> Yhÿ, quê ha hane he. Quê ha me pajõ Pahhiti pê Jeju ajpên cõjkwa pĩnwry ne ihkrãhhia kam me pamã caràr. Quê ha haneane cõjkwa pĩn Pahpãm mãmemprar catêjê jõ pahhi caràr, quê ha pea Pahpãm jõ wakÿre te hõhhi harkwa cato. Quê ha mam Jeju na mehkwy tyc atajê kàj mã me mõ.

<sup>17</sup> Ne me pa, pom cu cormã me pahtîr na ame papa atajê, cu ha kÿj pême cuprõ mehtyc me, me pahte me pajõ Pahhiti pê Jeju cajpar prãmte, kÿj pê. Hõhõ, ita na cu ha me pajõtpê Jeju cahê na ame papa rohnÿtti mã.

<sup>18</sup> Cwÿrjapê ca ha ma me ijarkwa ita to me amji jahõtto me apa. Ne ma me akwÿ mã to amji kîn ton to me apa.

## 5

*Cu ha Jeju te amji jaxàr xà caxuw me amji cÿmpej*

### *2 Petrõ 3.8-13*

<sup>1</sup> Ýhÿ me ikjêjê, wa nee me amã amcro me caxwa nõ hyr xà na ihhóc to prãm nare. Por quê ha jÿ caxuw ampo hane ata na.

<sup>2</sup> Ampo na? Quê ha me pajõ Pahhiti pê Jeju te amji jaxàr xà ita pê ihhêj rÿm caxwa ri me hàhkÿj xicatêjê imprar xà. Quê ha nee jÿm ihtêm xà ita na hahkre pej nare.

<sup>3</sup> Quê ha ramã me pajõPahhiti ihtêm xàa kam, quê ha mehkwy me ajpên mã:

— Cu ha me pampeaj kam me pahcarÿcti kam ame papa, quê hanee me pahna ampo jamãrnare — hane. Hõ, quê ha me ajpên mã me harkwa tome hajÿr cacrõ, quê ha ihprõt pê Pahpãm te amji mãamcro hyr xà ata kam ahtwÿ. Quê ha ihprõt pê ampokên jàhtõa ne me hÿrmã cato. Quê ha mehkàj xà hane, pom quê hân ne pyjê mã ihkra hà he.

<sup>4</sup> Ampo na? He me cupê amji jahkre kêatre, cwÿrjapê ri me cupê awcapàtkõ catêjê. Ne me

ca, Jeju kam me ikjêjê, nee me apê awcapàtkô catéjênare. Cwÿrjapê quê ha Jeju te amji jaxàr xà jô amcro cato, ca ha nee ame amji mã me apikrar nare. Ampo na? He ramã ate amji mã me gâhcuprôn.

<sup>5</sup> Pom ramã me apê amcro jô amcro tekjêita? Ne nee me papê awcapàtkô jô awcapàtkô tekjê nare.

<sup>6</sup> Cwÿrjapê cu ha me hane, ne nee ame pajôt nare, ne mepariat na pahte amji kam me pajapac xà impejti kam ame papa to me pahcuhhê, ne xwÿ kam me amji jamãr nare.

<sup>7</sup> Ne awcapàtkô kam ri hãn neame gôr. Ne caxwa ri côxÿhti to ame amji peccatêjê ri caxwari côxÿhti to amehkôm to me ipa.

*Cu ha me pahÿj me amji jamãr pejti ne*

<sup>8</sup> Ne me pa, quêt me papê amcro jô amcro tekjê, cwÿrjapê cu xwÿ kam me amji jamãr nare to me hane he. Pom quê hãn ne krãhtare hõ hitô kà tÿjtiita me hõ krãhkà tÿjti itato hõtpê amji jÿ pytà ita pyràc pej ne, cu ha meamji kam me pajapac xà pytarto me papa. Ne me pahte Jeju to amji mã me pahhimpej xà ata me, me pamã ajpên kinti itajê pêihhêj rûm wakÿre te hitô kà tÿjti me hõ krãhkà itajê pyràac. Ne Jeju te me pahkên pê me pahpytâr xà ita pê ihhêj rûm krãhtare jô ihkrãhkà tÿjti ata pyràac. Hõhõ, me ate amji kam me gapac xà itajê to, ca ha me amji kampa, ne me to amji pytà, ne ahna me ato xar to me apa.

<sup>9</sup> Pê Pahpãm amji tète ame pahcurê xà caxuw amji mã me pahcapi nare. Ne quêt me pajõ

Pahhiti pê Jeju Crixto te me pahpytâr xà caxuw, pê Pahpãm amji mã me pahcapi.

<sup>10</sup> Ne me pahte Jeju Crixto cape na ame papa xà caxuw, pê me pantête amji to amtà, ne me pancwÿrjapê ty. He nee ihnõ na me pamã hÿpa xànare. He xà mORMõ ajkĩ me pahtyc, nare, cu me pahťiar naame papa, Jeju cator xàkam, cu ha me pahcunea cahê na ame papa rohnÿtti mã.

<sup>11</sup> Cwÿrjapê ca me ajpën tehcajpar to meapa, ne me amã amji kĩn na me amji ràn to me apa. Ne maahna me amji mã hakam. Pom ahnaa mã ramã me to ita na, ca ha kam me to acrà.

*Me hapackre xà cahhur*

*Epet 4.1-6; 1 Timot 5.17-19*

<sup>12</sup> Ÿhÿ me ikjêjê, wa ha me ana ahwÿ, ca ha me akamame hâpên to me ipa atajê to amji mã me ahimpeaj ne. Nãmri me pajõ Pahhiti Jeju te ri amji mãme capi, mâr quê amji kôt me ato ipa, ne me amã ampõ to hahkre to ipa.

<sup>13</sup> Ne jÿmjê atajê to catyt kam amji mã me ahimpej tome apa, ne amji mã mehkĩnti to me apa, ne catytkam ame ajpën kĩn to me apa.

<sup>14</sup> Ne wa ha cormã ihnõa to me amã icakôc. Ca ha ampeaj kam cute me xuwcacatiatajê japackre. Ne hanea ne me cute amji mã hàhtât to me ipa atajê na, ca ha mehràn, ne me cumã hakam to me apa. Ne por cute Jeju kôt kyre pê me amji ton, ne amji kam ihkôt me ipa atajê na, me hamâr nare, ne atÿj ahna mehtehcajpar to me apa. Nemehcunea to gàhtât to me apa.

<sup>15</sup> Ne ma ajpën na me to guphê, quê nee jÿm ajpën mãihkên to hãmjõr nare, mehkên xà atajê

nõ jahpan xà na. Ne ajteare mã ita to ca ha me to hane he. Ca ha gõtpeajpẽn mã me apejti ne, ne hanea neme cupê me akwỳ nare atajê to mempeaj ne.

*Cu ha me pahtỳj Pahpãm mã me pahcakôc to me papa*

<sup>16</sup> Ne gõtpe me gakrya ne, ne jũ caxuw me gakry tome hicu ne me amã amji kїн nare nare.

<sup>17</sup> Ne gõtpe Pahpãm mã me acakôc jicu nare.

<sup>18</sup> Por cute me amã ampo cunea jôr atajê jahpan xà na, ca hãn ne hõtpe me cumã acakôc, ne impejti na me harê, ne catihti na me harê, ne hūrên me gakryti na me amji jarê. Ne por quê ha cormã ihhêaj to ampo kên me awỳr cato ata cupate, ca nee me Pahpãm to amji mã me ahimpej jicu nare. Ampo na? Cormã Pahpãm mãme akїн, cwỳrjapê ca gõtpe Pahpãm pejti to mecumã acakôc ne me cumã harê. Hõhõ, atana ri Pahpãm mã me ana prãm. Pom ate Jeju to amji mã me ahimpej atajê na ri Pahpãm mã me ato prãm.

<sup>19</sup> Nee apu amji tête Pahpãm Carõ Pejti te me akam hàpẽn atajê cahpêrkâr to me apa nare.

<sup>20</sup> Quê Pahpãm Carõ Pejti jũm jũjarên na cumê, quê awjarê, ca ha nee me jũm ata jũjarên tête me hiprôn nare, nãmri nee harkwa ita kôt hamreare nare.

<sup>21</sup> Ne atỳj Pahpãm Carõ Pejti jarkwa kôt me amji mãgũjarên ita kam me to acrà. Ne amji to me ate me ampo kam gapac itajê cajpê, ne ampo pejti atajê, ca me kampa, ne amji mã me huwahi.

<sup>22</sup> Ne ampo kên atajê cunea pê amji to me awpjê.



<sup>23</sup> Ita na wa Pahpãm mã me acajrën to ipa, por Pahpãm te me pamã me pahcarĩcti jõr ata to, wa meamã ahna ahwỳ, quê me ato impeaj to ipa, ca me ateamji kam me gapac xà tũm nare ne, ne me acarõ jamã, ne me acaxwỳn jamã, ne me akrekà jamã, mãr quê me amã ihtetetti ne. Ne nee jũ kam ihtũm kênrenare. Ampo na? Quê ha me pajõ Pahhiti pê Jeju Crixto amji jaxà ne me atetetti na me ana prãm.

<sup>24</sup> Ne Pahpãm te ri ita na me papa na, me pamẽn, ne taa mã quê ha me pahtehcajpa, cu ha ita na kam me to pancrà. Nãmri Pahpãm ita harkwa cakrô to ihcakôc nare. Ne ramã cute me pahtehcajpar na amji ton.

<sup>25</sup> Ỡhỹ me ikjêjê, ca ha hanea ne Pahpãm mã icajrën to me apa.

<sup>26</sup> Ca ha me pahkjêjê cunea mã ite mehkĩnti to ite me cumã hàpà na, ca ha me cumã ijarẽ.

<sup>27</sup> Ne ite ampeaj kam me pajõ Pahhiti jarkwa kôt me amãn, ca me pahkjêjêcunea mã ijõ kàhhôc ita cahyt.

<sup>28</sup> Ỡhỹ, wa hãn ne ijõtpê me pajõ Pahhiti pê Jejuna ahwỳ, quê me amã apejti caxuw impejti cunea gõ. Hamre, ita pit.

**PAHPÃM JARKWA CUPAHTI JÕ KÀHHÔC**  
**Canela: PAHPÃM JARKWA CUPAHTI JÕ KÀHHÔC**  
**(Portions)**

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 1 Oct 2024 from source files  
dated 29 Jan 2022

09d4e460-c38b-52b7-81c1-8300bfeb466a